

# НЭ'МА ПАВЛОСЭ ПЕШЬН ТИМОТ'ЕЙОР'А

## Пешготьна институте

Тимот'ейо хортэки бавэрмэнди жь Асия Бьч'ук бу, дийа ви щьһу<sup>ф</sup> бу, ле баве ви йунан<sup>ф</sup> (К'аред Шандийа 16:1). Павлос дэма шандитийа<sup>ф</sup> хвэйэ дөдада бажаре Листрайеда р'асти Тимот'ейо те. Пэйр'а Тимот'ейо дьбэ һэвал-хэбате вийи пеш, һэвал-хэбатэки вийи гэлэки незик, нава р'еуитийа вида. Бона we йэке наве ви гэлэк щара К'аред Шандийада у һ'эму нэ'ме Павлосда те биранине (Р'омайи 16:21; 1 Корьнт'и 4:17; Филипи 1:1; 1 Т'есалоники 1:1; 3:2, 5, 6; 2 Т'есалоники 1:1 у йед майин). Павлос гэлэк щара бона щьвинед<sup>ф</sup> ну амьнийа хвэ ви ани, нава щур'э-щур'э пьрсед зэ'мэтэ гьранда.

Нэ'ма Павлосэ пешьнда, йа кө Тимот'ейор'а дышинэ, се хэме ви һэнэ:

1. Бона һинкьрьна шашэ нава щьвинеда дьбежэ, wэки мьрати хвэ бьн у илаһи<sup>ф</sup> жь we һинкьрьна шашэ кө гьһиштиё щьвина эфэсе (1:3). Эв һинкьрьна жь фэ'ме щьһутийе у п'утп'арьстийе<sup>ф</sup> дьһат у сэр һиме we бавэрийе<sup>ф</sup> бу кө дьготьн: «Эва дьһиа бэрч'э'вайэ т'эбийэти хьраб э». Иди ль гора фэ'мкьрьна ван, мэрвь<sup>ф</sup> т'эне дькарьбу пе занэбун у сэрвахтикэ<sup>ф</sup> сөр'э вэшарти хьлаз буйа, өса жи гэрэке хвэ жь хварьн-вэхварьна у һ'ал-зэwаше дур бьгьртана. Эв һинкьрьн иро бь наве «Гьностик» те готьне (бь йунани «ГНОСЬС» те фэ'мкьрьн «занэбун») у нава сэдсалийед пешьнда, илаһи сэдсалийа дөда у сьсийада фьрэ бэла бьбу.

## 1 ТИМОТ'ЕЙО 1:1–4

2. Бона р'абун-р'уньштън у қольхе щъвине дьбежэ, ль к'о бона хэйсэте сэрвер, бэрпърсийар у бэрдэстийада жи дьбежэ.

3. Ширэта дьдэ Тимот'ейо. Тимот'ейо йэки шаһъл бу, дьбэ лэма эw һьнэки жь we борщдарийе вэдьк'ъшийа (2 Тимот'ейо 1:7). Ширэта дьдэ wi, к'о эw щъвинеда гьран бэ, бь р'абун-р'уньштъна хwэ бьбэ х'оламэки хwэйе нэхше қэнщ бона Мэсиһ у щабдарийа к'омед мэсиһийэ<sup>ф</sup> щур'э-щур'э жи һьлдэ сэр хwэ.

### Сэрэщэма фькьра нэ'ме

Пешготън (1:1-2)

Бона щъвине у хэбатк'аред we (1:3-3:16)

Т'эмийед хэбатеяэ бона Тимот'ейо (4:1-6:21)

### Сьлавед Павлос

**1** <sup>1</sup> Жь Павлос, шандийе<sup>ф</sup> Мэсиһ Иса, бь э'мьре Хwэдейе Хьлазкьре<sup>ф</sup> мэ у Мэсиһ Исайте г'омана мэ,

<sup>2</sup> Тимот'ейоие лаве хwэйи бавэрийедайи<sup>ф</sup> һэq-һ'элалр'а:

Дэ бьра р'э'м, к'эрэм<sup>ф</sup> у э'дълайи жь Бав<sup>ф</sup> Хwэде у Мэсиһ Исайте Х'одане<sup>ф</sup> мэ ль тэ бэ.

### Ширэтед дэрһэqа һинкьръна дэрэwда

<sup>3</sup> Гава эз дьчумэ Мэкэдонйаие, мын һиви жь тэ кьр, к'о ль Эфэсе бьмини, wэки т'эмийе бьди чэнд кэса, к'о һинкьръна нэр'аст һин нэкън <sup>4</sup> у г'оһ нэдьнэ ч'ловискийа у р'эqэма сьлсьлэта<sup>ф</sup> к'о хьлазийа ван т'онэ. Эв йэк һе

шэр'-дэ'wa т'эвр'адькэ, нэ кӧ т'ъвдира\* Хwэдeйэ кӧ бь бawэрийе те наскърьне\*\* мийасэр дькэ. <sup>5</sup> Сэре т'эмийе һ'ызкърьн э, кӧ жь дьле сах, бь исафа<sup>ф</sup> р'ьһ'эт у жь бawэрийа бедӧр'ути йэ. <sup>6</sup> Ђнэк же дагэр'ийан у пэй готьнед п'уч' к'этн. <sup>7</sup> Дьхwазьн бьбьнэ дэрсдаред Qануне, ле эw хwэха жи ньзаньн чь дьбежьн, нэ жи wan тыштед кӧ дьдьнэ зора хwэ ф'эм дькьн.

<sup>8</sup> Эм заньн кӧ Qанун қэнщ э, һэгэр йэк бь қануни we бьқэдинэ. <sup>9</sup> Бэле ф'эмдари йэ, кӧ қанун бона р'аста найе дайине, ле бона нэһэқ у сэрһ'ышка, бона нэп'ак у гӧнэк'ара<sup>ф</sup>, бона мьр'дар' у һ'эрама<sup>ф</sup>, бона бавкӧж у декӧжа, бона меркӧжа, <sup>10</sup> бенамуса, к'она, дьзед мэрийа, дэрэвин у шэ'дэдэрэwa йэ у бона һэр кэсед дьнэ кӧ тыштед мьқабьли һинкърьна сахлэм дькьн. <sup>11</sup> Эв һинкърьн ль Мьзгинийа хwэйир'умэтэ Хwэдeйе хwэзьли дьгьрэ, к'ижан ль мьн һатийэ спартьне<sup>ф</sup>.

### Шекърандьна һьндава р'э'ма Хwэдеда

<sup>12</sup> Эз жь Мэсиһ Исaйе Хӧдане мэ р'ази мэ, йе кӧ қэwат да мьн, эз амьн һ'эсаб кърьм, данимэ сэр ве хьзмэтк'арийе.

<sup>13</sup> Эз жи бэре ль wi дьк'ьфьрим, эw дьзеранд у нэйарти ль wi дькър, ле р'э'м ль мьн бу, чьмки мьн нэбawэрийеда бь нэзанийа хwэ кърьн. <sup>14</sup> К'эрэма<sup>ф</sup> Хӧдане мэ п'ьр' сэр мьнда р'эжийа, т'эви бawэри у һ'ызкърьна Мэсиһ Иса. <sup>15</sup> Ве готьнеда хельф т'ӧнэ у лап һежайи қэбулкърьне йэ, кӧ: «Мэсиһ Иса һатэ дьне, гӧнэк'ара хьлаз<sup>ф</sup> бькэ», сэре

---

\* 1:4 «Т'ъвдира Хwэде» аһа жи те ф'эмкърьне: «Wэк'илтийа Хwэде, йа кӧ да дэсте щьмэ'та хwэ».

\*\* 1:4 Аһа жи те ф'эмкърьне: «Т'ъвдира Хwэдeйэ кӧ бь бawэрийе тинэ сери<sup>ф</sup>».

## 1 ТИМОТ'ЕЙО 1:16–2:7

к'ижана эз ым. <sup>16</sup> Ле бона we йэке р'эм ль мын бу, wэки Мэсиг Иса сэр мын, чава сэре гөнэк'ара т'эмамия сэбра хwэ бьдэ к'ьфше, чава нэхшэк бона ван, йед кө we ви бawэр бькын, жийина<sup>ф</sup> h'эта-h'этайе бьстиньн. <sup>17</sup> Аwa бьра ви П'адшайе h'эта-h'этайеийи нэмьри у нэхöйа, Хwэдейе бешьрики-бешэвалр'a hөрмэт у р'умэт бэ h'эта-h'этайе! Амин<sup>ф</sup>.

<sup>18</sup> Ве т'эмийе эз дьдьмэ тэ, лаwe мын Тимот'ейо, ль гора ван п'ехэмбэртийед<sup>ф</sup> кө пешда бона тэ бун, wэки тö бь ван шэр'е хwэйи qэнщ бьки, <sup>19</sup> дэст жь бawэрийе нэкэ у исафа хwэ р'ьh'эт хwэй кэ. Ынэка эв йэк жь хwэ дур хьстьнэ, дэwра бawэрийа хwэ wэлгэр'андьн. <sup>20</sup> Жь ван бун, нумэнайо у Скэндэр, йед кө мын данэ дэсте Мирещьн<sup>ф</sup>, wэки эw хин бьн Хwэде нэк'ьфьрн.

### Дэрhэqa дöа у щьвинедa<sup>ф</sup>

**2** <sup>1</sup> Аwa эз ниви дькьм, бэри hэр тышти бона h'эму мэрьва<sup>ф</sup> дöа бькын, р'эща кьн, лава кьн, р'азибуне бьдьн, <sup>2</sup> öса жи бона п'адша у h'эму сэрwера, wэки эм жийинэкэ э'дъл у сэqьр'и дэрбаз кьн, бь т'эмамия хwэденасийе у маquлийе. <sup>3</sup> Ль бэр Хwэдейе Хьлазкьре мэ эв э qэнщ у ль ви хwэш, <sup>4</sup> кө дьхwазэ h'эму мэрьв хьлаз бьн у р'астийе нас кьн. <sup>5</sup> Чьмки Хwэдек hэйэ у нава Хwэде у мэрьвада жи навчетик, Мэсиг Исайе мэрьв, <sup>6</sup> кө хwэ жь бэр к'ьр'ина гьшкава да. Эв йэк р'аст wэхтда бу избати, кө Хwэде дьхwазэ h'эму хьлаз бьн. <sup>7</sup> У бона we йэке эз даннасинкьр у шанди hatьмэ к'ьфшкьрьне, (эз р'аст дьбежьм, дэрэwa накьм,) нэщьhуйар'a бумэ дэрсдаре бawэрийе у р'астийе.

<sup>8</sup> Аwa эз дьхwазьм кö мер һәр дэра дэстед хwэйэ һ'элал бьльнд кьн, бе һерс у бе шэр'-дэ'w\* дöа бькьн.

<sup>9</sup> Öса жи бьра к'өлфэт<sup>ф</sup> бь к'ьнщед лайиц, шэрме у бэрбьһерийе хwэ бьхэмьлиньн, нэ кö бь гöли-гöжанга, йан зер', йан бь дөр'а<sup>ф</sup>, йан жи бь к'ьнщед бьһа, <sup>10</sup> ле бь кьред қәнщ, чава ль wан к'өлфэта дьк'эwэ, йед кö наве хwэденасийе һьлданэ сэр хwэ. <sup>11</sup> Бьра к'өлфэт кэр' һин бэ, бь т'эмамия гöһдарийе. <sup>12</sup> Эз изьне надьмэ к'өлфэт, кö һин бькэ, нэ жи һ'öкöми сэр мер бькэ, ле бьра дэнг нэкэ. <sup>13</sup> Чьмки пешийе Адэм<sup>ф</sup> хöльқи, паше һewa <sup>14</sup> у Адэм нэхапийа, ле жьн хапийа у нэһэқи кьр. <sup>15</sup> Ле жьн һ'але зар'анинеда жи we хьлаз бэ\*, һэгэр бь бэрбьһерийе нава баwэрийе, һ'ьзкьрьне у пақьжайийеда бьминьн.

### Бона сэрwеред щьвине

**З**<sup>1</sup> Ве готьнеда хельф т'öнэ: һэгэр тэме йэки ль сэрwертийе һэйэ, эw шьхöлэки қәнщ дьхwазэ. <sup>2</sup> Аwa сэрwер гэрэке беқöсур бэ, мере жьнэке бэ, хwэгьрти, ақьлда гьран, мақул, меванһ'ьз, һинкьрьнеда сэрхwэ бэ, <sup>3</sup> нэ сэрхwэш, нэ сьр'тук, ле бэрбьһер, нэ шэр'уд, нэ п'эрэһ'ьз. <sup>4</sup> Бьра малхетийе р'ьнд ль мала хwэ бькэ, зар'ед хwэ гөр'а<sup>ф</sup> хwэда һэр алийава мақулийеда мэзьн кэ. <sup>5</sup> (Чьмки һэгэр йэк ньзанэ малхетийе ль мала хwэ бькэ, we чава бькарьбэ щьвина<sup>ф</sup> Хwэде хwэй кэ?) <sup>6</sup> Бьра нэ жи баwэрмэнде ну бэ, кö нэбэ к'öбар бэ, диwана wi жи мина йа Мирещьн бе кьрьне. <sup>7</sup> Wэки дьн жи гэрэке қэдьре wi

\* 2:8 Аһа жи те фэ'мкьрьне: «Бе дöдьли».

\* 2:15 Жь сэдсалийа йэке һ'эта сьсийа һинкьрьна «гьностикийе» фьрэ бэла дьбу у дьгот, кö п'еше кэвантийе у зар'анине гöнэ йэ.

щэм йед жь щьвине дэр жи хэбэ, кө нэбэ бе р'эзилкьрьне у бьк'эвэ т'элэка Мирещьн.

### **Бона бэрдэстийед щьвине**

<sup>8</sup> Өса жи бьра бэрдэсти гьран бьн, хэбэрданеда дөр'утийе нэкьн, хwэ нэдьнэ шэраве, пэй к'эда һ'эрам нэк'эвьн. <sup>9</sup> Р'астийа бавэрийейэ э'йанбуйи\* бь исафа р'ьһ'эт хwэй кьн. <sup>10</sup> У эвана жи бьра пешда бенэ щер'ьбандьне<sup>ф</sup>, һэгэр тыштэк сэр ван т'өнэбэ, һынге бьра бэрдэстийе бькьн. <sup>11</sup> Өса жи бьра жьнед ван\* гьран, нэ бөхданбеж, ле хwэгьрти, һэр тыштида амьн бьн. <sup>12</sup> Бэрдэсти гэрэке мере жьнэке бэ, қэнщ малхетийе ль зар' у мала хwэ бькэ. <sup>13</sup> Эwед кө р'ьнд бэрдэстийе дькьн, хwэр'а дэрэщэкэ бьльнд қазьнщ дькьн у сэрбэстикэ<sup>ф</sup> мэзьн дэст тиньн бона бавэрийа Мэсһ Иса.

### **Сөр'а хwэденасийе**

<sup>14</sup> Эз кө ван тышта тэр'а дьньвисьм, гөман һэйэ эзе зутьрэке сэр тэда бем. <sup>15</sup> Ле һэгэр эз дэрэнги жи бьк'эвьм, те заньби гэрэке чава мала Хwэдеда р'абьн-р'унен, йа кө щьвина Хwэдейе сах э, стун у һ'име р'астийе йэ. <sup>16</sup> Бе хэбэрдан, гэлэки к'ур э сөр'а хwэдеп'арьстийа мэ:

Эw бь бэдэни хойа бу,  
Р'өһ'ва р'астийа wi һатэ избаткьрьне,  
мьльак'этава<sup>ф</sup> һатэ дитьне,  
нав мьлэта һатэ даннасинкьрьне,  
дьнийайеда һатэ бавэркьрьне

---

\* 3:9 Бь йунани хэбэр бь хэбэр аһа йэ: «Сөр'а бавэрийе». Эв те фэ'мкьрьне кө сөр'а вэшарти э'йан бу.

\* 3:11 Аһа жи те фэ'мкьрьне: «Жьнед бэрдэсти».

у р'умәтер'а һатә һьлатьне.

### Дәрсдаред дәрәw

**4** <sup>1</sup> Р'öh' ашкәрә дьбежә, кә р'ожед ахьрийеда һьнәк we жь бawәрийе бьк'эвьн, гөһ бьдьнә р'öh'ед дәрәwин у һинкьрьнед щьна<sup>ф</sup>. <sup>2</sup> Әw һинкьрьн бь дөр'утига дәрәwина дьбьн, исафа к'ижана к'эзьри йә. <sup>3</sup> Әw мәрвь һ'ал-зәwаше дьдьнә һьлдане, жь ван хварьна пашда дьдьнә гьртьне, к'ижан Хwәде әw бона бawәрмәнд у р'астинаскьрийа ә'фьрандьнә, кә бь р'азибуне бьхьвьн. <sup>4</sup> һәр тьште кә Хwәде ә'фьрандийә қәнщ ә у тьштәки һ'ерам теда т'өнә, һәгәр бь р'азибун те қәбулкьрьне, <sup>5</sup> чьмки бь хәбәра Хwәде у дәа қәбул дьбә.

### Қөльхк'аре Мәсиһ Исайи қәнщ

<sup>6</sup> һәгәр тә ван ширәта бьди хушк-бьра, те бьби қөльхк'аре Мәсиһ Исайи қәнщ, чаwа тә хwәха жи бь ван готьнед бawәрийе у һинбуна қәнщә кә тә пәй чуйи, қьнийат дьби. <sup>7</sup> Хwә жь ч'ьловискийед пирайә һ'ерам дур хwәй кә. Хwә хwәденасийеда һиндар<sup>ф</sup> кә. <sup>8</sup> һиндарийа қальб кери һьндьк тьшти те, ле йа хwәденасийе кери һәр тьшти те, созе we һьн ль ве дьне һәйә, һьн жи ль we дьне. <sup>9</sup> Ве готьнеда хельф т'өнә у лап һежайи қәбулкьрьне йә. <sup>10</sup> Бона ве йәке әм дьхәбьтьн у дьчәрчьрьн, чьмки әм гөмана хwә ль Хwәдейе сах тиньн, кә Хьлазкьре һ'әму мәрвьа йә, илаһи<sup>ф</sup> йе бawәрмәнда.

<sup>11</sup> Т'әмийа ван тьшта бьдә у һин кә. <sup>12</sup> Нәбә кә йәк щаһьлтийа тә беһөрмәт кә, ле тә бawәрмәндар'а бьбә нәхшәк, хәбәрданеда, р'абун-р'уньштьнеда, һ'эзкьрьнеда, бawәрийе у һ'әлалийеда. <sup>13</sup> һ'әта һатьна мьн хwә бьдә we

йэке, кө щьмэ'тер'а ньвисаред<sup>ф</sup> пироз бьхуни, ширэт ки, хин ки. <sup>14</sup> Ђндава we п'ешк'еша<sup>ф</sup> хвэйэ р'öh'анида бе хэм нибэ, йа кө бь п'ехэмбэртийе тэр'а һатийэ дайине, гава бэрпърсийара дэсте хвэ данинэ сэр тэ. <sup>15</sup> Гөһе тэ сэр ван тышта бэ у нава ванда бьминэ, wэки пешдачуйина тэ һ'эмуйава э'йан бэ. <sup>16</sup> һаш жь хвэ у хинкърьна хвэ һэбэ. һэр гав нава ванда бьминэ, чьмки бь ви тьһэри те хвэ жи хьлаз ки у ван жи, к'ижанед гөһдарийа тэ дькьн.

### Щабдарийа бона э'мьре мэзын у бьч'ука

**5** <sup>1</sup> Дьле калэмера нэешинэ, ле дьл бьдэ ван, чава баве хвэ. Щаһьла чава бьрайед хвэ һ'эсаб кэ, <sup>2</sup> пира чава дийа хвэ, к'өлфэтед щаһьл чава хушкед хвэ, wэкэ шире һ'элал.

### Жьнэбийед э'дэти

<sup>3</sup> Qэдьре жьнэбийа бьгьрэ, йед кө бь э'дэти жьнэби нэ. <sup>4</sup> Ле һэгэр зар' йан нэвийед жьнэбике һэбьн, бьра эw зар' пешийе мала хвэда хин бьн чава хвэденасийа хвэ бьдьнэ к'ьфше у бь ви тьһэри дэине де у баве хвэ вэгэр'иньн, чьмки эв йэк ль Хвэде хвэш те. <sup>5</sup> Жьнэбийа э'дэти эw э, йа кө т'эне майэ у гөмана хвэ данийэ сэр Хвэде, шэв у р'ожед хвэ бь дөа у р'эща дэрбаз дькэ. <sup>6</sup> Ле йа кө к'ефа дьле хвэр'а йэ, мьрийа нэч'элкьри йэ. <sup>7</sup> Ван тышта т'эми кэ, wэки белэк'э бьн. <sup>8</sup> Ле һэгэр мэрвьэк бона хвэхатийа хвэ, илаһи бона мала хвэ хэм накэ, эwi бавэри инк'ар<sup>ф</sup> кьрийэ у жь нэбавэра жи хьрабтьр э.

<sup>9</sup> Бьра наве we дэфт'эра жьнэбийада бе ньвисаре, к'ижан жь шест сали кемтьр нинэ, щарэке жи меркьри буйэ, <sup>10</sup> бь кьрьнед қэнщва жи бэрбьч'э'в э: Мэсэлэ, зар' мэзын кьрьбьн, меван қэбул кьрьбьн, ньгед бавэрмэнда

шушт'ьбьн, дэст авитьбэ к'этийа у бона һэр шьхөле қәнш жи һазьр сэкьни йэ.

<sup>11</sup> Ле жьнэбийед шаһьл қэбул нэкэ, чьмки гава эвана тэме хвэ хьраб дькьн, бэре хвэ жь Мэсиһ дьгөһезьн, дьхвазьн мер кьн <sup>12</sup> у бь ви авайи эви суци һьлтиньнэ сэр хвэ, чьмки созе бэре данэ алики.\* <sup>13</sup> Сэрда жи мал бь мал дьгэр'ьн, хвэр'анэдити һин дьбьн, нэ т'эне хвэр'анэдити нэ, өса жи гьлигэр'о, т'эви шьхөле хэлце дьбьн у тыштед нэщайиз хэбэр дьдьн. <sup>14</sup> Ава эз дьхвазьм кө жьнэбийед шаһьл мер кьн, зар'а биньн у малкьр бьн, wэки зьмен нэкьнэ дэве нэйара. <sup>15</sup> Чьмки иди һьнэк жьнэбийед шаһьл хальфин<sup>ф</sup>, пэй Мирещьн чун. <sup>16</sup> һэгэр жьнэбийед бавэрмэндэке\* һэбьн, бьра эw алик'арийа wan бькэ у щьвине баргьран нэкэ, wэки щьвин бькарьбэ алик'арийа жьнэбийед э'дэти бькэ.

### Бона бэрпърсийара

<sup>17</sup> Эw бэрпърсийаред кө сэрwерийе р'ьнд дькьн, бьра дөбарэ һежайи қэдър бьн, илаһи эвед кө хэбэрдан у һинкьрьнеда дьхэбьтьн. <sup>18</sup> Чьмки ньвисар дьбежэ: «Дэве гайе бедэреда дьхэбьтэ гьренэдэ»\* у «П'алэ һежайи һэце

---

\* 5:11-12 һьнэк аһа фэм дькьн: Жьнэбийед щьвинеда навед хвэ бона хьзмэткьрьне дэфт'эра щьвинеда дьданэ ньвисаре, лэма те готьне, кө жьнэбийед шаһьл қэбул нэкэ, чьмки бь we қьраре навед хвэ дьданэ ньвисаре, wэки диса мер нэкьн, ле т'эне щьвинер'а хьзмэтийе бькьн. Ле гава дьхwэстьн мер бькьрана, соз-қьраре хвэ дьт'эр'ьбандьн.

\* 5:16 Нав дэстньвисаред қәншда «бавэрмэнд» қьсьме жьне те фэмкьрьне, ле дэстньвисаред һьнэкада «бавэрмэнд» те фэмкьрьне һьн қьсьме жьне, һьн жи мер, өса жи һьнэк дэстньвисарада т'эне мер те фэмкьрьне.

\* 5:18 Қануна Дөщари 25:4.

хвэ йэ»\*\*. <sup>19</sup> Хэйба һындава бэрпърсийарда бавэр нэкэ, һэгэр дө йан се шэ'дэ т'өнэбьн. <sup>20</sup> Бэрпърсийаред кө нава гөнада дьминьн, ль бэр һ'эмуйа ле һьле<sup>ф</sup>, вэки йед майин жи бьтърсын.

<sup>21</sup> Эз ль бэр Хвэде, Мэсиһ Иса у мьляк'этед бьжарти дькмэ дэине стуйе тэ, кө тө ван ширэта бе т'агери<sup>ф</sup> хвэй ки, тыштэки бь фьрқийе нэки.

<sup>22</sup> Дэсте хвэ зу данэйнэ сэр йэки бона хьзмэтк'арийа Хөдан, нэ жи т'эви гөнед йед майин би. Хвэ пақыж хвэй кэ.

<sup>23</sup> Жь вьр шунда т'эне аве вэнэхвэ, ле һьнэки жи шэраве т'эв кэ, бона щийе мэх'андьна хварьне, кө зу-зу нэхвэш дьк'эви.

<sup>24</sup> һьнэк һэнэ, кө гөнед ван к'ьфш ьн у р'аст ван дьбьнэ бэр диwane, ле гөнед һьнэка жи паше we к'ьфш ьн. <sup>25</sup> Оса жи кьрьнед қэнц к'ьфш ьн у эв кьрьнед кө нэ к'ьфш ьн, эв жи вэшарти наминын.

### Бона хөлама

**Б**<sup>1</sup> Эвед кө ьн нире хөламтийеда нэ, ьбра ахайед хвэ һ'эсаб кьн чава һежайи қэдьре ьльнд, вэки наве Хвэде у һинкьрьна мэ нэйе беһөрмэткьрьне. <sup>2</sup> Ахайед к'ейэ бавэрмэнд һэнэ, ьбра ван беһөрмэт нэкьн, чьмки эв ьбрайед һэв ьн. Ле ьбра хөлам һе р'ьнд хөламтийе ькьн, чьмки йед кө к'аре жь хьзмэтк'арийа хөлама дьстиньн, бавэрмэнд ьн у дэлап ьн.

---

\*\* 5:18 Луқа 10:7.

**Хьзна р'аст**

Ван тышта хин кэ у ширэт кэ. <sup>3</sup> Нэгэр йэк тыштэки дьн хин бькэ у готьнед Хөдане мэ Иса Мэснхэ сахлэм у хинкьрьна хвэдеп'арьстийа мэ нэ қайл э, <sup>4</sup> эw йэки к'өбар э у тыштэки ньзанэ. Эw нэхwэшийа шэр' у дэ'вава гьрти йэ, жь we жи пешда тен: h'эвсуди, нэйарти, к'ьфьри-зьфьри, шыкед хьраб <sup>5</sup> у шэр'уди. Эв h'эму тышт жь нава мэрьвед қафсэқэт у жь р'астийе шуна р'эшва чуйи пешда тен. Эвана хвэденасийе h'эсаб дькьн, чава канийа к'аре.

<sup>6</sup> Бэле хвэденаси к'ара сэр к'аре йэ, нэгэр бь р'азибуне бэ. <sup>7</sup> Мэ т'ө тышт нэанийэ дьне у эме нькарьбьн т'ө тышти жи бьбьн. <sup>8</sup> Ле к'ьнщ у хөрэке мэ нэбьн, бь ван эм р'азии бьн. <sup>9</sup> Ле эвед кө дьхвэзын дэвлэти бьн, тенэ щер'ьбандьне, дьк'эвьнэ т'элэка у гэлэк тэмед ахмах у зийанк'ар, к'ижан мерьв нөқи мират'ийе у веранбуне дькьн. <sup>10</sup> Чьмки п'эрэх'эзи каникэ нэр щур'э хьрабийе йэ. Ньнэка хвэ данэ we, жь бавэрийе хальфин у хвэ кьрьнэ хвэйе көл у дэрда.

**Т'эмийед Павлос бона Тимот'ейо**

<sup>11</sup> Ле тө, мэрьве Хвэде жь ван тышта бьр'эвэ у пэй р'астийе, хвэденасийе, бавэрийе, н'ызкьрьне, сэбьре у мьлуктийе нэр'э. <sup>12</sup> Лэща бавэрийеда қэнщ бьр'эвэ, жийина н'эта-н'этайе қазьнщ кэ, к'ижанер'а тө нати газикьрьне у ль бэр гэлэк шэ'да тэ эw иқрара<sup>ф</sup> қэнщ иқрар кьр. <sup>13</sup> Ль бэр Хвэдейе кө э'мьр дьдэ н'эму э'фьрина у ль бэр Мэснх Исайе кө ль бэр Пилатойе<sup>ф</sup> Понтийо шэ'дэтийа иқрара қэнщ да, эз т'эмийе дьдьм тэ, <sup>14</sup> кө тө ве т'эмийе белэк'э у беқөсур хвэй ки, н'эта хөйабуна Хөдане мэ Иса Мэснх. <sup>15</sup> Хөйабуна ви we вэхте хвэда жь

алийе Йе хвэзэли у Т'энейи қəват, П'адшайе п'адшайа у Хөдане хөданада э'йан бə. <sup>16</sup> Т'эне эви нəмьри йə, нава р'онаийеда йə, кə т'ө кəс нькарə незик бе. Т'ө қул-бəнда əв нəдитийə у нə жи дькарə бьбинə. Қəдьр у қөдрəта һ'эта-һ'этайе wir'a бə! Амин.

### **Т'эмийа бона дəвлəтийа**

<sup>17</sup> Т'эмийе бьдə дəвлəтийед ве дьне, бьра бабах нəбьн у гөмана хвə нəдьнə сəр һəбука<sup>ф</sup> п'уч'ə дəрəв, ле ль сəр Хвəдейе кə һəр тышти бь мəр'дани дьдə мə, вəки əм мьраз пе бькьн. <sup>18</sup> Бьра қəнщийа бькьн, бь кьрьнед қəнщ дəвлəти бьн, мəр'д бьн у п'арəвəкьрьнер'a жи һазьр.

<sup>19</sup> Бь ви тыһəri əве хвəр'a хьзнəке т'оп кьн, һ'имəки қəнщ бона ахрəте, вəки ве жийина кə р'асти жийин ə қазьнщ кьн.

### **Т'эмийед ахьрийе**

<sup>20</sup> Тимот'ейо! Чь кə ль тə һатə спартьне хвəй кə. Жь готьнед п'уч'ə һ'əрам у шəр'-дə'wa дур бə, кə бь дəрəв наве «занəбун» данə сəр. <sup>21</sup> һьнəка хвə данə ве йəке у бь ви авайи жь бавəрийе хальфин.

К'эрəма Хвəде вəр'a бə.